

Inissiamik attartorsinnaanermut peqqussutip allanngortinneqarnissaanik, ilanngullugulu inuit ataasiakkaat najugaqarfigisinnaasaat pillugit ilaneqarnissaanik Inatsisartut kingusinnerpaamik ukioq 2012-imi upernaakkut ataatsimiinnissaannut ineqarneq pillugu maalaaruteqartarfiup pisinnaatitaanerata annertusineqarnissaanut Naalakkersuisut saqqummiusseqqullugit Inatsisartut aalajangiiffisassaattut siunnersuut

pillugu

Attaveqarnermut Ineqarnermullu Ataatsimiititaliap

ISUMALIUTISSIISSUTAA

Siunnersuutip aappassaaneerreqarnerani saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Justus Hansen, Demokraatit, siulittaasoq
 Inatsisartunut ilaasortaq Olga P. Berthelsen, Inuit Ataqatigiit, siulittaasup tullia
 Inatsisartunut ilaasortaq Debora Kleist, Inuit Ataqatigiit
 Inatsisartunut ilaasortaq, Anders Olsen, Siumut
 Inatsisartunut ilaasortaq Malik Berthelsen, Siumut

Ataatsimiititaliap siunnersuut UKA 2011-mi ulloq 10. marts 2011-mi siullermeerneqareermat misissorpaa.

Siunnersuutip imaa siunertaalu:

Inissiani Namminersorlutik Oqartussat aamma kommunit attartortittagaanni attartortut attartortitsisullu akornanni saqitsaassutit kisimik pineqartarnerisa saniatigut inuit ataasiakkaat najugaqarfigisinnaasaat ilanngullugit maalaaruteqartarfiup pisinnaatitaanerata annertusineqarnissaa aalajangiiffisassaattut siunnersuutikkut siunnersuuteqartup kissaatigaa. Maleruagassat ullumikkutut itsillugit inuit ataasiakkaat inissiaataanni attartortut attartortitsisumut atatillugu saqitsaassutaat eqqartuussivinnut suliassanngortinneqarsinnaapput, tamannalu siunnersuuteqartup isumaa malillugu aaqquissuussineq pissusissamisuunngilaq.

Inatsisartut siunnersuummik siullermeerinninnerat

Inuit Ataqatigiit, Demokraatit, Siumut aamma Kattusseqatigiit Partiiata siunnersuut taperserpaat, inuit ataasiakkaat inissiaataani attartortittakani attartortut pisortat inissiaataani attartortittakkani attartortutulli maalaaruteqarnissamut periarfissaqartitaanissaat partiit isumaqatigimmassuk.

Atassutip siunnersuut tapersersunngilaa, aalajangiiffigisassatut siunnersuut piviusunngortinneqarpat tamanna inuit ataasiakkaat inuussutissarsiutaannut akuliunnertut partiip isumaqarfigimmagu.

Ataatsimiititaliap siunnersuummik suliarinninnera

Aalajangiiffigisassatut siunnersuutip tapersersorneqarnissaa Naalakkersuisut akissuteqaamminni kaammattuutigigaat ataatsimiititaliap malugaa. Tassunga atatillugu inissianik attartortitsisarneq pillugu maleruagassat allanngortinneqarnissaat pillugu suliat Naalakkersuisut aallartereersimagaat tassungalu atatillugu inuit ataasiakkaat najugaqarfigisinnaasaat ilanngullugit ineqarneq pillugu maalaaruteqartarfiup pisinnaatitaanera Naalakkersuisut annertusitinniaaraat ataatsimiititaliataaq maluginiarpaa.

Ineqarneq pillugu Maalaaruteqartarfiup ilaasortaasa katitigaanerat pillugu allannguutissatut siunnersuummik Naalakkersuisut saqqummiussinerisigut inuit ataasiakkaat inissianik attartortut inuillu ataasiakkaat attartortitsisartut aamma maalaaruteqartarfimmi ilaasortaataitaqalernissaat isumaliutigineqartariaqarneranik siunnersuuteqartup isumaa Ataatsimiititaliap isumaqataaffigaa.

Siunnersuuteqartumit saqqummiunneqartutut Ataatsimiititaliaq aammattaaq isumaqarpoq inuit ataasiakkaat inissiaataanni attartortittakkani attartortut, inissianik attartortitsisarneq pillugu peqqussummi § 83, imm. 5 naapertorlugu maalaaruteqartarfiup sulineranut aningaasaleeqataasalernissaat pissusissamisuussasoq.

Siunnersuutip aningaasatigut kingunerisassai


Inatsisissamik siunnersuusiornissami allaffissornikkut sulisut atorneqartussaammata siunnersuut pisortanut aningaasartuutunik kinguneqassasoq ataatsimiititaliap arajutsisimanngilaa. Taamaattorli inissianik attartortitsisarneq pillugu inatsisip nutarternissaanut 2011-mut aningaasanut inatsimmi illuartitsisoqareersimanagera allannguinnissallu Ineqarnermut, Attaveqarnermut Angallanermullu Naalakkersuisoqarfiup suliaanut aallartinneqareersunut ilanngunneqarnissaata naatsorsuutigineqarnera tunngavigalugit aningaasatigut kingunissat killeqarnissaat naatsorsuutigineqarpoq.

Inatsisartut peqqussutaani §§ 33-35 tunngavigalugit ineqarnermut akiliut aningaasartuutit tunngavigalugit annertussusilerneqartarnissaa suli aalajangiusimaneqarmat ineqarnermut akiliutip annertussusilernissaannut maleruagassat allannguutissatut siunnersuutikkut


matumuunakkut allanngortinneqartussaanninnerat erseqqissarneqassasoq ataatsimiititaliap pingaaruteqartutut isigaa. Taamaalilluni inuit ataasiakkaat inuussutissarsiornerannut siunnersuut aningaasatigut kinguneqassanngilaq.

Attaveqarnermut Ineqarnermullu Ataatsimiititaliap inassuteqaataa
Siunnersuut akuersissutigineqassasoq **Ataatsimiititaliap isumaqatigiittup** inassutigaa.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.




Justus Hansen
Siulittaasoq




Olga P. Berthelsen



Debora Kleist



Anders Olsen



Malik Berthelsen